

MEMORANDUM
O RAZUMIJEVANJU I SARADNJI U OBLASTI ZAŠTITE I SPAŠAVANJA

Sarajevo, juli 2014. godine

MEMORANDUM

O RAZUMIJEVANJU I SARADNJI U OBLASTI ZAŠTITE I SPAŠAVANJA

Između

Ministarstva sigurnosti Bosne i Hercegovine, sa sjedištem u Zgradi prijateljstva između Grčke i Bosne i Hercegovine, Ulica Trg BiH broj 1 u Sarajevu

i

Asocijacije građana za upravljanje rizicima - AZUR, sa sjedištem u Ulici Vitomira Lukića 12a u Sarajevu

U daljem tekstu: Ugovorne strane

OPĆE NAPOMENE

Imajući u vidu visok stepen rizika i ugroženosti Bosne i Hercegovine od prirodnih ili drugih nesreća i mogućih teških posljedica po živote i imovinu ljudi, Ministarstvo sigurnosti Bosne i Hercegovine i Asocijacija za upravljanje rizicima - AZUR, kao nevladina organizacija koja okuplja vrhunske stručnjake iz različitih oblasti značajnih za zaštitu i spašavanje, utvrdili su značaj međusobne saradnje u ovoj oblasti kroz zajedničke aktivnosti u cilju unapređenja sigurnosti građana Bosne i Hercegovine.

Ciljevi i aktivnosti Asocijacije su, između ostalog, da radi na razvijanju svijesti građana Bosne i Hercegovine o prevenciji i upravljanju prirodnim i ljudskim djelovanjem izazvanim katastrofama, praćenju svjetskih i evropskih dostignuća i trendova u toj oblasti putem organiziranja različitih javnih manifestacija, vrši medijsku propagandu, edukaciju i slično. Ciljevi su i aktivno djelovanje u svrhu organiziranja humanitarnih akcija, kurseva i seminara radi edukacije članova Asocijacije, lokalnih zajednica i građana, kao i saradnja sa istim ili sličnim asocijacijama u zemlji i inozemstvu u svrhu ostvarivanja ciljeva i djelatnosti Asocijacije.

Uvažavajući mogućnost i značaj stručnog valoriziranja u razvoju i unapređenju sistemskih poslova sigurnosti, Ministarstvo sigurnosti Bosne i Hercegovine je opredijeljeno da kroz saradnju sa nevladinom organizacijom AZUR, pored ostalog, doprinese ispunjavanju zakonskih i međunarodnih obaveza u oblasti zaštite i spašavanja kao i bržem napredovanju Bosne i Hercegovine u članstvo NATO-a i Evropske unije.

Ministarstvo sigurnosti Bosne i Hercegovine i nevladina organizacija AZUR izražavaju spremnost da u skladu sa svojom misijom i zakonski utvrđenim nadležnostima, a putem zajedničkih aktivnosti izgrađuju i razvijaju sistem zaštite i spašavanja u oblastima djelovanja Ministarstva sigurnosti Bosne i Hercegovine, a koje su predmet analitičko-stručnog i drugog rada u okviru asocijacije AZUR. Memorandum predstavlja polaznu osnovu za razvoj partnerstva zasnovanog na ravnopravnosti i uzajamnom poštovanju, nastao kao izraz potrebe da se utvrde okviri i vidovi buduće saradnje u oblasti zaštite i spašavanja.

MODALITETI SARADNJE

- (1) Predmet saradnje po ovom memorandumu podrazumijeva slijedeće modalitete:
 - a) analitičko-stručna saradnja u razvoju metoda prevencije, procjenjivanja i analiziranja rizika od prirodnih ili drugih nesreća;
 - b) uzajamna saradnja kroz organizaciju i učešće u obukama, seminarima, radionicama, vježbama i drugim specijalističkim modulima obučavanja;
 - c) ekspertna pomoć i obostrana saradnja u unapređenju pripravnosti za prirodne ili druge nesreće i planiranju kapaciteta za odgovor na eskalaciju rizika i nastanak nesreća;
 - d) saradnja u programima obučavanja i osposobljavanja zaposlenih u organizacijskim jedinicama u sastavu Ministarstva sigurnosti Bosne i Hercegovine i svih ostalih aktera u sistemu zaštite i spašavanja;
 - e) uzajamna saradnja i podrška u izradi, Okvirnim zakonom o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini, utvrđenih planskih i organizacijskih dokumenata u oblasti zaštite i spašavanja;
 - f) zajednički nastup u pripremi i realiziranju projekata u procesu približavanja Bosne i Hercegovine Evropskoj uniji;
 - g) uzajamna saradnja u organiziraju i radu domaćih i inozemnih strukovnih asocijacija, udruženja i tehničkih komiteta direktno ili indirektno vezanih za oblast zaštite i spašavanja.
- (2) Memorandumom mogu biti razvijeni i drugi oblici saradnje u oblasti zaštite i spašavanja iz nadležnosti Ministarstva sigurnosti Bosne i Hercegovine i AZUR-a utvrđeni Okvirnim zakonom o zaštiti i spašavanju kao i Zakonom o ministarstvima i drugim organima uprave Bosne i Hercegovine i Zakonom o udruženjima i fondacijama kao i drugim propisima i dokumentima, te propisima i dokumentima kojima se reguliraju nadležnosti i djelokrug rada AZUR-a.
- (3) Trajanje Memoranduma nije vremenski ograničeno i evaluira se godišnjom procjenom rezultata projekata koji su predmetom ovog memoranduma, a koju će izvršiti Ugovorne strane.

NADZOR NAD PROVEDBOM MEMORANDUMA

- (1) S ciljem osiguranja provedbe dogovorenih aktivnosti, Ugovorne strane formiraju zajednički tim koji vrši redovan nadzor i evaluaciju rezultata saradnje.
- (2) Ugovorne strane će održavati sastanke najmanje dva puta godišnje, a po potrebi i češće.

RELEVANTNI ZAHTJEVI UGOVORNIH STRANA

- (1) Asocijacija za upravljanje rizicima - AZUR iskazuje spremnost da u skladu sa svojim mogućnostima i kapacitetima intenzivno radi na ostvarivanju ciljeva predmetnog memoranduma, te izražava nadu da će, u slučaju potrebe, dobiti podršku Ministarstva sigurnosti Bosne i Hercegovine prilikom iniciranja projekata koji će biti usmjereni na izgradnju sigurnijeg okruženja u Bosni i Hercegovini i ispunjavanju strateških ciljeva Ministarstva.
- (2) Ministarstvo sigurnosti Bosne i Hercegovine saglasno je i spremno da, shodno zakonima utvrđenim nadležnostima i planiranim sredstvima za realizaciju projekata, dogovora i ugovora s Asocijacijom za upravljanje rizicima - AZUR zajedničke aktivnosti iz Memoranduma u svrhu efektivne i efikasne realizacije sistemskih zadataka u izgradnji i razvoju kapaciteta Bosne i Hercegovine za sigurnost i zaštitu građana.
- (3) Vidovi i oblici podrške, te planirani obim saradnju definirat će se kroz posebne dokumente na osnovu inicijative neke od ugovornih strana.

ZAVRŠNE ODREDBE

- (1) Memorandum je neograničenog trajanja, ali može prestati važiti na zahtjev Ugovornih strana, na osnovu najave, najmanje mjesec dana prije otkazivanja, uz detaljno obrazloženje razloga takve odluke.
- (2) Ovaj memorandum potpisan je u 2 (dva) istovjetna primjerka, na službenim jezicima u Bosni i Hercegovini (na dva pisma), gdje svaka ugovorna strana zadržava po jedan primjerak.
- (3) Memorandum stupa na snagu danom potpisivanja.

Potpisano u Sarajevu, 24.07.2014.godine

Za Ministarstvo sigurnosti
Bosne i Hercegovine

Mladen Čavar, zamjenik ministra



Za Asocijaciju za upravljanje
rizicima – AZUR

Doc. dr. Sanin Džidić, predsjednik

